

Ulice pune leševa u nigerijskom Kanou

21 Jan 2012 Izmijenjeno 17:34 CET

Najmanje 120 ljudi ubijeno u nizu bombaških i oružanih napada na sjeveru Nigerije, gdje je većinsko muslimansko stanovništvo



Boko Haram je preuzeo odgovornost za napade [Reuters]

U nizu bombaških i oružanih napada u nigerijskom drugom najvećem gradu Kanou ubijeno je najmanje 120 osoba, javili su Crveni križ i nacionalna služba za upravljanje kriznim situacijama. Prethodno su izvještaji agencije AFP iznijeli podatke o najmanje 80 mrtvih. Svjedok je u subotu javio da su ulice pune leševa u jednom naselju. U Kanou, najvećem gradu na većinski muslimanskom sjeveru, nasilje je eskaliralo u petak navečer kada su stanovnici čuli više od 20 eksplozija i pucnjave, dok je osam policijskih stanica, imigracionih ureda i zgrada bilo pod napadom, prenosi Fena.

Svjedok stradanja

Najveći dnevni list na sjeveru Nigerije Daily Trust piše da je glasnogovornik skupine Boko Harama preuzeo odgovornost za napade. „Trenutno se nalazim na jednoj od ulica u svom susjedstvu. Između moje kuće i policijske stanice izbrojao sam 16 mrtvih tijela koja su se nalazila na ulicama, od kojih su šest policajaci“, rekao je Naziru Muhamed, stanovnik Kanoa za AFP. Policijski zvaničnik, koji je zahtijevao da ostane anonimn, rekao je da ne može dati tačan broj poginulih, ali zna da ima više desetina mrtvih. Dvadesetčetverosatni policijski sat uveden je u subotu u nigerijskom gradu Kano, nakon koordiniranih bombaških napada u kojima je ubijeno najmanje sedam ljudi. Među metama napada bile su policijska stanica i štab državne policije, a puškaranje se moglo čuti širom drugog po veličini nigerijskog grada. Militantna grupa Boko Haram saopćila je da je odgovorna za napade. Grupa stoji iza nedavne kampanje nasilja na većinski muslimanskom sjeveru zemlje. U međuvremenu, organizatori kontroverznog masovnog mitinga "građanski aktivisti" zakazanog za subotu u prijestonici Lagosu, otkazali su skup nakon napada. Organizatori demonstracija protiv korumpiranosti vlade i vojnog prisustva u Lagosu tvrde kako strahuju da bi se militanti mogli umiješati među njih i stvoriti haos koji bi odnio još života. Vlasti su saopćile da će policijski sat u Kanou biti na snazi do daljnjeg, nakon napada u petak navečer.

Zbunjujuća situacija

Policijske i vojne blokade na cestama postavljene su širom grada u roku od nekoliko minuta nakon eksplozija, saopćili su Reutersu lokalni zvaničnici. Policija navodi u saopćenju da je "sedam žrtava potvrđeno na raznim lokacijama napada" u Kanou, a pojavila su se strahovanja da bi broj ubijenih mogao rasti. U saopćenju se navodi da su napadnute četiri policijske stanice širom grada, sjedište Državne službe sigurnosti, kao i pasoški i imigracioni uredi. Svjedok je rekao Al Jazeera da je vidio najmanje sedam tijela, uključujući pet imigracionih oficira i dva civila. Vlasti nisu potvrdile broj žrtava. Reporter Al Jazeera Ahmad Idris je rekao da je najmanje osam policijskih stanica napadnuto. „Stanovnici su rekli da su čuli pucnjavu u nekim dijelovima grada“, rekao je on. „Situacija je zbunjujuća u Kanou, neki govore da su zatvorenici otpušteni iz policijskih stanica.“

Nigerija, afrička zemlja s najvećim brojem stanovnika i najveći proizvođač nafte na kontinentu, ima 160 miliona stanovnika, među kojima je podjednak broj muslimana koji uglavnom žive na sjeveru, i kršćana, na jugu, prenosi Hina.

Izvor: Al Jazeera